

O A Mea o le a Tutupu i e o Soifua ma e ua Maliliu i le Afio Mai Faalua o Iesu Keriso?

TUSI LESONA SEMINARE O LE FEAGAIGA FOU

Faitau le 1 Tesalonia 4:13–18, ma vaavaai mo malamalamaaga e uiga i mea o le a tutupu i e amiotonu pe a toe afio mai Iesu. Maitau le eseeseaga i le va o le mea o le a tupu ia i latou o e ua maliliu ma i latou o loo soifua pea i le Afio Mai Faalua. (O upu “momoe” ma le “moe” i nei fuaiupu e faasino ia i latou o e ua maliliu.) Atonu e fesoasoani le faitau le Faaliliuga a Iosefa Samita i le 1 Tesalonia 4:15, 17 (i le fuaiupu 15, vaefaamatalaga *a*, ma le fuaiupu 17, vaefaamatalaga *a*).

- O le a se mea e taua ia te oe i nei fuaiupu?

Ona faitau lea o le Mataupu Faavae ma Feagaiga 88:96–98, ma vaavaai mo malamalamaaga faaopoopo e uiga i nei mea na tutupu. (Atonu foi e te manao e faitau fuaiupu 99–101 e aoao ai e uiga i le mea o le a tupu ia i latou o e lei taliaina Iesu Keriso i lenei olaga.)

- O a ni malamalamaaga faaopoopo na e mauaina?

O se tasi o upumoni atonu na e faailoaina e faapea o le **Au Paia faamaoni o e maliliu a o lei oo i le Afio Mai Faalua o le a toetutu pe a toe afio mai Keriso.**

O le faaupuga “aveina ae” (1 Tesalonia 4:17) e faasino i e amiotonu o loo afaatasi e fetaii ma le Faaola i Lona afio mai. E toatele Kerisiano e faaogaina le upu *ave olaina* (mai se faaupuga Latina o lona uiga o le “aveina ae”) pe a faasino i le taimi lea.

Na faasoa mai e Elder Neil L. Andersen o le Korama a Aposetolo e Toasefululua, e uiga i lenei mea paia na tupu:



E leai se mea e faaosofia ai lo’u manao e tautala e uiga ia Keriso nai lo le vaai atu faalemafaufau i Lona toe afio mai. E ui tatou te le iloa pe o afea

o le a la toe afio mai ai, ae o mea e tutupu i Lona toe afio mai o le a ofoofogia! O le a afio mai o la i ao o le lagi i le mamalu ma le matagofie faatasi ma Ana agelu paia uma. E le na o se vaega itiiti o agelu, ae o Ana agelu paia uma lava. E le o le kerupi alafau mūmū na valiina e Lafaele, lea tatou te vaaia i luga o a tatou kata faamanuia o le Valenitina. O agelu nei o seneturi, o agelu na auina mai e tapunipuni gutu o leona, e talai faitotoa o falepuipui, e fofoga mai Lona soifua mai ua leva ona talitalia, e faamafanafana o la i Ketesemane, e faamautinoa i Ona soo i Lona Afio Ae, ma ia tatala le Toefuataiga matagofie o le talalelei.

Pe mafai ona tatou vaai faalemafaufau ua aveina a’e i tatou e faafetaiai o la, a le o i le itu lenei, po o le isi itu o le veli? O Lana folafolaga lena i e amiotonu. O lenei aafiaga ofoofogia o le a faailogaina ai o tatou agaga e faavavau. (Neil L. Andersen, “Matou te Tautalatala e uiga ia Keriso,” *Ensign* po o le *Liahona*, Nov. 2020, 91)

Faaoga sina taimi e vaai faalemafaufau ai pe faape’i le faitauina faatasi ma e amiotonu i le afio mai o le Faaola.

- O a ni ou mafaufauga po o ni lagona atonu e i ai i lena aso? O le a sou lagona i le iloaina e finagalo le Faaola ia te oe e faatasi ma Ia pe a afio mai o Ia? E faapefea e le mafaufauina o lena aso i le lumanai ona aafia ai oe i le asō?

I le 1 Tesalonia 4:18, sa fautuaina ai e Paulo le Au Paia e “feamafanafanaai i nei upu.”

- E faapefea ona tuuina atu e aoaoga a Paulo ia te oe le mafanafana? E mafai faapefea ona latou tuuina atu le mafanafana i tulaga i le lumanai e ono feagai ma oe?

O LE EKALESI A
IESU KERISO
O LE AU PAIA O ASO
E GATA AI